

## Nek Beebiyaan

**Injeel : Luqaas 1:26-56**

Beebī Elishibā jab haamilā theen to shuru ke chah maheene ke dauraan Allaah taa'alā ne apne farishte Jibraa'eel<sup>(a.s)</sup> ko ek kuñwaarī paakdaaman laḍkī ke paas bhejā jo Naazreth shahar ke Galeel naam kī jagah par rahtī thī. Us laḍkī kī shaadī janaab Yusuf naam ke ek ādmī se tay huī thī jo Daaud<sup>(a.s)</sup> ke kḥaandaan se the. Us paakdaaman laḍkī kā naam beebī Maryam thā.<sup>(26-27)</sup> Farishtā unke paas āyā aur kahā, “Mubaarak ho! Allaah taa'alā ne āpko barkat dī hai aur wo āp par meharbaan hai.”<sup>(28)</sup> Lekin beebī Maryam ye baat sun kar pareshaan ho gaeñ aur soch me paḍ gaeñ, “Is baat kā kyā matlab hai?”<sup>(29)</sup>

Farishte ne unse kahā, “Ghabaraaie naheen. Ye islie hai kyunki Allaah rabbul azeem āpse bahut kḥush hai.<sup>(30)</sup> Sunie! Āp haamilā hoñgī aur ek laḍke ko paidā kareñgī. Us laḍke kā naam āp Īsā rakhiegā.<sup>(31)</sup> Wo itnā zyaadā azeem hogā ki log kaheñge ki wo sabse azeem baadshaah kā waaris hai. Allaah taa'alā use usī ke buzurg, baadshaah Daaud, kī baadshaahī atā karegā.<sup>(32)</sup> Wo hameshā Ibraaniyoñ par hukumat karegā aur uskī baadshaahī kabhī bhī kḥatm naheen hogī.”<sup>(33)</sup>

Beebī Maryam ne farishte se kahā, “Ye sab kaise hogā? Maiñ to ek kuñwaarī laḍkī huñ.”<sup>(34)</sup> Farishte ne beebī Maryam se kahā, “Allaah rabbul ālameen apnī ruh aur qudrat se ye karegā. Islie, ye bacchā jab paidā hogā to log usko Ādam kī tarah samjheñge, [a] jisko Allaah taa'alā ne kḥud banaayā, aur Allaah taa'alā kā paak Maseehā kahalaaegā.<sup>(35)</sup> Sunie! Beebī Elishibā, āpkī rishtedaar, jiske baare me log kahte the ki wo baañjh hai, wo bhī chah maheene se haamilā hai.<sup>(36)</sup> Allaah rabbul ālameen ke liye kuch bhī naamumkin naheen!”<sup>(37)</sup> Beebī Maryam ne farishte se kahā, “Maiñ Allaah taa'alā kī kḥidmat me haazir huñ. Maiñ duā kartī huñ ki aisā hī ho jaisā āp kah rahe haiñ!” Aur phir farishtā wahañ se chalā gayā.<sup>(38)</sup>

Phir beebī Maryam jaldī se taiyaar hokar apne kasbe me gaeñ jo mulk Yahudiyā me thā.<sup>(39)</sup> Wo Zakriyā<sup>(a.s)</sup> ke ghar gaeñ aur wahañ jā kar beebī Elishibā ko mubaarakabaad pesh karī.<sup>(40)</sup> Jab beebī Elishibā ne beebī Maryam kī mubaarakabaad ko sunā to unke peṭ me jo bacchā thā wo uchhlā aur beebī Elishibā Allaah taa'alā ke nur se roshan ho gaeñ.<sup>(41)</sup> Wo bahut tez āwaaz me kḥush hokar boleñ, “Allaah taa'alā ne āpko sab auratoñ se zyaadā barkat dī hai aur wo bacchā bhī barkat paaegā jise āp paidā kareñgī.<sup>(42)</sup> Āp hamaare Maseehā kī maañ haiñ aur mere paas yahañ āī haiñ! Kyā maiñ itnī kḥushnaseeb huñ?”<sup>(43)</sup> Jab maine āpkī āwaaz sunī, to peṭ me merā bacchā kḥushī se uchhal paḍā.<sup>(44)</sup> Allaah taa'alā ne āpko barkat dī hai kyunki āp ne uske kalaam par yaqeen kiyā thā.”<sup>(45)</sup>

Ye baateñ sun kar beebī Maryam ne kahā,

“Merī ruh Allaah taa'alā kī taareef kartī hai,<sup>(46)</sup>  
mere dil ko sukun hai kyunki merā rab merā madadgaar hai.<sup>(47)</sup>

“Maiñ Allaah taa'alā kī naacheez bañdī huñ, lekin phir bhī wo merī himaayat kartā hai.  
Aur ab, saarī nasleñ mujhe mubaarak kaheñgī,<sup>(48)</sup>  
kyunki Allaah rabbul azeem ne mere liye baḍā kaam kiyā hai.  
Uskā naam paak hai.<sup>(49)</sup>

“Allaah rabbul kareem hameshā raham kartā hai,  
un logoñ par jo us par yaqeen rakhte haiñ,  
unkī aulaadoñ par aur unkī āne waalī nasloñ par.<sup>(50)</sup>

“Allaah taa'alā kī qudrat ne baḍe-baḍe kaam kie haiñ.  
Usne un logoñ ko bhaṭkā diyā  
jo kḥud par gūrur karte the aur apne baare me baḍī-baḍī baateñ karte the.<sup>(51)</sup>

“Allaah taa'alā ne zaalim baadshaahoñ ko unke taḳht se utaar phenkā,  
aur rahamdil logoñ ko baadshaah banā diyā.<sup>(52)</sup>

“Allaah rabbul kareem bhukhoñ ko nemateñ dene waalā hai  
aur wo ameeroñ ko kḥaalī haath lautā detā hai.<sup>(53)</sup>

“Ibraaniyoñ me se jisne Allaah taa'alā kī kḥidmat karī, wo usī kī madad kartā hai.  
Wo karam karnā kabhī naheen bhultā.<sup>(54)</sup>

“Usne hameshā Ibraaheem<sup>(a.s)</sup> par aur unkī aulaadoñ par karam karā,  
jaisā ki usne unke buzurgoñ se waadā kiyā thā.”<sup>(55)</sup>

Beebī Maryam beebī Elishibā ke paas teen maheene raheen aur phir apne ghar waapas laut āeen.<sup>(56)</sup>

---

[a] Quraan Majeed : Ale-Imraan 3:59